

- प्रधानमंत्री नरेन्द्र मोदी काल देश री 9 वंदे भारत रेलगाड़ियां ने खाना करेला- प्रदेश री तीजी वंदे भारत गाड़ी उदयपुर-जयपुर बीच सुरू व्हेला।
- प्रधानमंत्री काल आकाशवाणी ऊं प्रसारित कर्या जावण वाळा खास कार्यक्रम मन की बात मांय विचार बतावेला।
- देश रा तीन चौथाई गांवा मांय खुला मांय शौच बंद व्हयो- साल 2024-25 ताई सगळा गांवां मांय स्वच्छता रो लक्ष्य।
- एक राष्ट्र एक चुनाव रा मुद्दा माथे बणायी ज्यी समिति री नुवी दिल्ली मांय पहली मीटिंग व्ही।

000

प्रधानमंत्री नरेन्द्र मोदी काल वीडियो कांफ्रेंस रे मार्फत प्रदेश री तीजी वंदे भारत एक्सप्रेस रेलगाड़ी ने उदयपुर ऊं झंडी बता र जयपुर सारू खाना करेला। ई मौके उदयपुर मांय राख्या जावण वाळा खास जळसा मांय सांसद अर्जुन लाल मीणा समेत जनता रा केई नुमाइंदा मौजूद रेहवेला। इण ऊं पैली काल ई रेलगाडी रो उदयपुर ऊं जयपुर बीच कामयाबी सागे ट्रायल रन करी ज्यो। 25 सितम्बर ऊं आ गाड़ी नियमित तौर ऊं चालण लागेला। ई गाड़ी रे मार्फत उदयपुर-जयपुर बीच सफर रा बगत मांय डोढ घंटा री कमी आवेला। प्रधानमंत्री काल रा कार्यक्रम मांय आठ दूजी वन्दे भारत रेलगाड़ियां री सुरूआत ई करेला।

000

प्रधानमंत्री नरेन्द्र मोदी विधि व्यवस्था ऊं जुड्या जाणकारां ऊं ऐडी वैश्विक कानूनी प्रक्रिया तैयार करण बाबत कह्यो है जिण ऊं साइबर आतंकवाद अर धनशोधन सरीखी गतिविधियों रो सामो कर्यो जा सके। वे आज नई दिल्ली मांय दो दिन रा अंतर्राष्ट्रीय अधिवक्ता सम्मेलन रा उद्घाटन जळसा मांय बोल रह्या हा। न्याय व्यवस्था में उभरती चुनौतियां मुद्दा माथे राख्यी ज्या ई सम्मेलन मांय प्रधानमंत्री कह्यो के साइबर अपराध, धनशोधन अर कृत्रिम बुद्धिमता रा गलत इस्तेमाल सरीखी चुनौतियां रो सामो करण सारू वैश्विक व्यवस्था तैयार करणो जरूरी व्हे ग्यो है। मोदी कह्यो के केवल एक सरकार ऐडो नी कर सके है अर ई सारू न्यारा-न्यारा देशां री कानूनी प्रणालियां ने मिल र काम करणो व्हेला। वे कह्यो के जद खतरा वैश्विक हो तो वां रो सामनो करण रा तरीका ई वैश्विक व्हेवणा चाहिजे। लारला दिनां संसद मांय पास करी ज्या महिला आरक्षण बिल-2023 रो जिकर करता थकां प्रधानमंत्री कह्यो के नारी शक्ति वंदन अधिनियम भारत मांय महिलावां रा विकास ने नुवी दिशा अर ऊर्जा देवेला। श्री मोदी कह्यो के विधि व्यवसाय ऊं जुड्या लोगां रो अनुभव स्वतंत्र भारत री नीव मजबूत कीनी है।

वे कह्यो के न्यायपालिका अर वकील भारत री न्याय प्रणाली ने बरसां ऊं संभाळ र राख्यी है। प्रधानमंत्री कह्यो के न्याय व्यवस्था ऊं जुड्या जाणकार देश बणावण मांय खास काम करे है। ई मौके केन्द्रीय मंत्री अर्जुन राम मेघवाल कह्यो के प्रधानमंत्री नरेन्द्र मोदी री अगुवाई अर मार्गदर्शन मांय सरकार कारोबार ने आसाण बणावण सारू कारोबारी झगडा सुलझावण अर अनुबंध प्रणाली ने मजबूत करण री कोशिश कीनी है।

0000

प्रधानमंत्री नरेन्द्र मोदी काल संवारे 11 बज्यां आकाशवाणी ऊं प्रसारित कर्या जावण वाळा खास कार्यक्रम मन की बात मांय विचार बतावेला। आ हर महीना प्रसारित कर्या जावण वाळा ई कार्यक्रम री एक सौ पांच वीं कडी व्हेला। ओ कार्यक्रम आकाशवाणी अर दूरदर्शन रा पूरा नेटवर्क माथे प्रसारित कर्यो जावेला। ई सागे ई मन की बात कार्यक्रम आकाशवाणी री वेबसाइट अर न्यूज ऑन एआईआर मोबाइल एप माथे ई सुण्यो जा सकेला। मन की बात

कार्यक्रम रो आकाशवाणी, दूरदर्शन समाचार, प्रधानमंत्री कार्यालय अर सूचना अर प्रसारण मंत्रालय रा यूट्यूब चैनल माथे ई प्रसारण कर्यो जावेला।

000

आकाशवाणी जयपुर रा क्षेत्रीय समाचार एकांश कानी ऊं अंशकालिक संवाददाता सारु मांगी ज्यी अर्जियां जमा करावण री आखिरी तारीख बधार 30 सितंबर कर दी है। उम्मीदवार अजमेर, अनूपगढ़, बालोतरा, ब्यावर, डीग, डीडवाना-कुचामन, दूदू, फलौदी, गंगापुरसिटी, जयपुर, जयपुर ग्रामीण, जैसलमेर, जोधपुर ग्रामीण, केकड़ी, कोटपूतली-बहरोड़, खैरथल-तिजारा, नीम का थाना, प्रतापगढ़, पाली, सलूमबर, सांचौर अर शाहपुरा जिलां मांय अंशकालिक संवाददाता रा तौर ऊं आकाशवाणी समाचार, जयपुर साथे काम करण बाबत् अर्जियां दाखिल कर सके है। उम्मीदवार

www.newsonair.gov.in वेबसाइट माथे **vacancies** टेब मांय जा र अर्जी रो मजमून अर पी.टी.सी. गाइडलाइन देख र वां रा हिसाब ऊं अर्जी दाखिल कर सके है।

0000

देश रा तीन चौथाई गांवा मांय खुला मांय शौच बंद व्हे ग्यो है। जल शक्ति मंत्री गजेंद्र सिंह शेखावत आज नई दिल्ली मांय खबरनवीसां ने आ जाणकारी दीनी। वे बतायो के स्वच्छ भारत मिशन ग्रामीण रा दूजा दौर रा तहत 43 हजार ऊं बत्ता गांवां रे ओडीएफ प्लस व्हेवण रो ऐलाण करी ज्यो है। ओडीएफ प्लस रो दर्जा खुला मांय शौच मुक्त व्हेवण सागे ही ठोस अर तरल अपशिष्ट प्रबंधन प्रणाली लागू करण वाळा गांवां ने दियो जावे है। केन्द्रीय मंत्री कहयो के 14 राज्य अर केंद्र रा राज वाळा प्रदेश सौ फीसदी गांवां रे ओडीएफ प्लस रो दर्जा हासिल कर लीनो है। वे कहयो के सरकार स्वच्छ भारत मिशन ग्रामीण रा दूजा दौर रा तहत साल 2024-25 ताई देश रा सगळा गांवां मांय स्वच्छता हासिल करणो तैय कीनो है। जल शक्ति मंत्री कहयो के ई महीना री 15 तारीख ने सरु करी ज्यी स्वच्छता सेवा गतिविधियां मांय 5 करोड़ ऊं बत्ता लोग शिरकत कर चुक्या है।

000

कांग्रेस रा अध्यक्ष मल्लिकार्जुन खड़गे अर पार्टी रा आला नेता राहुल गांधी आज जयपुर मांय प्रदेश कांग्रेस रो नुवो दफतर बणावण रा काम री नींव रखी। ई पाछे राख्यी ज्यो कार्यकर्ता सम्मेलन मांय राहुल गांधी कहयो के पूरो विपख महिला आरक्षण बिल री हिमायत कीनी। वे कहयो के राजस्थान मांय कांग्रेस री सरकार चिंरजीवी स्वास्थ्य बीमा योजना सरीखी योजना चलायी। वे पार्टी रा कार्यकर्तावां ऊं जनता बीचे जा र राज्य सरकार रा कामां री जाणकारी देवण बाबत कहयो।

000

झुंझुनू जिला मांय 478 स्वास्थ्य केंद्रां माथे आज एक दिन रो आयुष्मान भवः स्वास्थ्य मेळो लगायी ज्यो। ओ मेळो आवता थावर ने ई आं सगळा केंद्रां माथे लगायो जावेला। ई मौके सीएमएचओ डॉ. राजकुमार डांगी बतायो के आं मेळां मांय आवण वाळां री आभा आईडी बणायी जावेला। वे बतायो के जिला मांय कोई 8 लाख आभा आईडी बणायी जावणी है ज्यां मांय ऊं 5 लाख 92 हजार ऊं बत्ती आईडी बणा दीरीजी है। वोट देवण बाबत् जाग जगावण सारु आं मेळां मांय न्यारा काउंटर बणायी ज्यो है। मोबाइल माथे क्यूआर कोड रे जरिए मतदान जागरूकता री शपथ ई दिरायी ज्यी।

000

उपराष्ट्रपति जगदीप धनखड़ वां री जोड़ायत डॉ. सुदेश धनखड़ सागे प्रदेश रा एक दिन रा दौरा सारु आज दूदू पधार्या। वे संत शिरोमणि धन्ना भगत री जन्मस्थली नोखा नाडी चौरु रा मंदिर मांय दर्शन कर र पूजा-अर्चना कीनी। ई मौके वे वठे मौजूद जनता सागे बातचीत ई कीनी अर संत शिरोमणि धन्ना भगत री जन्मस्थली चौरु धाम ने बेमिसाल बतायी।

000

एक राष्ट्र एक चुनाव रा मुद्दा माथे बणायी ज्यी समिति री आज नई दिल्ली मांय पहली मीटिंग व्ही। सरकार ई महीना री दो तारीख ने पैली वाळा राष्ट्रपति रामनाथ कोविंद री सदरत मांय आठ सदस्यां री समिति बणावण री अधिसूचना जारी कीनी ही।

000

गुजरात रा राज्यपाल आचार्य देवव्रत आज जयपुर मांय राज्यपाल कलराज मिश्र सागे शिष्टाचार भेंट कीनी। मुलाकात रे दौरान राज्यपाल मिश्र श्री देवव्रत ने वां री पोथी शिक्षा की संस्कृति अर 4 साल रा कार्यकाल रा बारा मांय छापी ज्यी पोथी संविधान संस्कृति की उज्ज्वल राहें री प्रति भेंट कीनी।

000

राज्यपाल कलराज मिश्र कह्यो है के भारत री संस्कृति मांय गुरु रो स्थान घणो खास है। वे आज पाली मांय एक वाचनालय रा उद्घाटन जळसा मांय बोल रह्या हा। राज्यपाल कह्यो के समाज ने आगे बधावण सारु संत महात्मावां रा चिंतन ने आगे बधावणो चाहिजे। कार्यक्रम मांय सांसद लहर सिंह सिरौया अर विधायक ज्ञानचन्द पारख ई मौजूद हा।

000

मुख्य सचिव उषा शर्मा अर पुलिस महानिदेशक उमेश मिश्रा आज अजमेर मांय संभाग स्तर रा अहलकारां सागे मीटिंग कर र आवता विधानसभा चुनाव री तैयारी रो जायजो लीनो अर जरूरी हुकम दीना। मीटिंग मांय अजमेर, केकड़ी, ब्यावर, डीडवाना—कुचामन, टोंक, शाहपुरा अर नागौर रा कलेक्टर अर एस.पी. शिरकत कीनी। मीटिंग पाछे खबरनवीसां सागे बातचीत करता थकां डी.जी.पी. मिश्रा कह्यो के मीटिंग मांय चुनाव आयोग रा हाल तांई रा निर्देशां रे मुजब करी ज्यी तैयारियां रा बारा मांय चर्चा करी ज्यी अर चुनाव रे दौरान कानून व्यवस्था पुख्ता बणायी राखण ऊं जुड्या जरूरी हुकम दिया ज्या।

000

सीकर जिला रा नीमेड़ा गांव मांय 25 सितम्बर ऊं सुन्दरदास जी महाराज रो मेळो सरु व्हेला। तीन दिन रा ई मेळा मांय कलश यात्रा, हवन, पूजा, मूर्ति प्राण प्रतिष्ठा अर रात्रि जागरण रा कार्यक्रम राख्या जावेला।

000

नागौर कृषि महाविद्यालय री राष्ट्रीय सेवा योजना री ओर ऊं आज स्वच्छता ही सेवा है अभियान रा तहत कार्यक्रम राख्यी ज्यो। एनएसएस रा स्वयं सेवक सिंगल यूज प्लास्टिक रा निपटारा अर भविष्य मांय सिंगल यूज प्लास्टिक काम नी लेवण रो संकल्प लीनो। ई मौके खुद सेवक महाविद्यालय परिसर अर आरे—सारे अभियान चला र साफ—सफाई कीनी।

000